



Kia whai tikanga te Kawenata
Making the Convention Real

UNIVERSITY of OTAGO

26-29 NOVEMBER 2017

Kia whai tikanga te Kawenata

Ko te kōrero tēnei o te takenga mai o te Kawenata o te Runanga Whakakotahi i ngā Iwi o te Ao mō ngā Tika o ngā Tāngata Hauā. He momo ōrokohanga, he kōrero nui whakaharahara ki a tātou o Aotearoa. He kōrero mō te here i te taura tangata puta noa i te ao. He kōrero herenga kore, he kōrero, he kōrero mō ā tātou mokopuna, mō ō tātou uri whakatupu. He kōrero kāore anō kia tae ki tōna otinga, he kōrero mō tātou katoa. Kei te hiahia mātou kia whai wāhi hoki koe ki tēnei kōrero taioreore.

Hei tēnei Whiringa-ā-rangi ka tonoa koe kia hui mai ki a mātou ki Ōtepōti, ki Aotearoa. Ka ako tātou i a rātou kua para kē te huarahi, i a rātou hoki kei te whakapeto ngoi ki ngā take hauā o te wā. Ka whakarongo tātou ki a rātou ka whakaterahia tēnei waka ki ngā ara moana, kia tae ki uta a tōna wā. Ka ako hoki tātou i rātou kei reira kē e noho ana.

Ko te reo pōwhiri ka rere atu ki a koutou e ngana kia whai tikanga te Kawenata nei: Ko koutou me ō wheako nui, ko ngā whānau, ko ngā kaitiaki, ngā kaitautoko, ngā kaiako, ngā mātanga, ngā ohu whakarato, ngā roia, ngā pakihī, ngā māngai hapori, ngā kaituhi kaupapa here, ngā kaimahi kāwana, ngā kairangahau, ngā ākonga ahakoa te pakeke. Ki a koutou katoa e aro atu ana, e whakapau werawera ana ki te iwi hauā, ki te whakatika i ngā hē kua ūhia ki runga i a rātou, ko te reo rāhiri tēnei e karanga atu nei. Tētahi o ngā kaupapa matua i tēnei hui kia whai wāhi ai tētahi hunga kanorau ake i ērā e tae atu ana ki ngā hui mātauranga, ki ngā hui rangahau. Kia taupatupatu ai, kia matapaki ai ngā take e hāngai ana ki te Kawenata.

Ko te tūmanako ia ka whai tikanga te Kawenata i tō ao, i Aotearoa, a, puta atu ki te ao whānui. Me whai hua te hunga hauā, te hunga tautoko hoki i tēnei Kawenata. Me hāngai, me whakaute ngā tini kōingo o te tangata, o te whānau, o te iwi, o te whenua. Mā tātou te Kawenata e whakatewhatewha kia puta ai he ara whakamua mō ō tātou orange. Mā tātou, a, mā ngā uri whakatupu.